

## Žutokljune galice (*Pyrhcorax graculus*) kod Spionika

**Alpine Choughs (*Pyrhcorax graculus*) near Spionik:** On 29 November 2009 a flock of the Alpine Chough (*Pyrhcorax graculus*) with 436 birds was recorded in the vicinity of Spionik. Such a big flock of the Alpine Chough has earlier been recorded on Mala Čvrstica.

Žutokljuna galica (*Pyrhcorax graculus*) je ptica selica, ali o tom aspektu zna se vrlo malo, barem u našim krajevima. Ornitološka posmatranja bilježe, u zimskim mjesecima, prisustvo ove ptice u primorju (sve do Mostara). Znamo da je, u kasnim jesenjim mjesecima, nema na planinama Bjelašnici, Treskavici, Prenju. Prema dva opažanja čini se kako se ova ptica u kasnu jesen sakuplja u velika jata na velikim hercegovačkim planinama. Prvi put smo, Ilhan Dervović i ja, vidjeli jato od 375 ptica 29.10.2006. godine na Maloj Čvrstici. Drugi put se to desilo prošle godine (29.11.2009.) u kasno popodne. Nakon što smo obišli pećinu ispod Spionika i u stranama i stijenama u barijeri ovog brda i vidjeli nekoliko desetaka žutokljunih galica, krenuli smo nazad prema cesti (Tušila-Bjelimići). Dok smo se spremali za kratku stanku za ručak iz pravca Ljute su prema Spioniku otkrstarila tri sura orla (*Aquila chrysaetos*). Njih smo već ranije opažali u tom kraju i oko sela Argud. Ispratili smo ih pogledom u nebo, a onda nastavili sa našim ručkom kada je iznenada iza brda, na jedva kojih stotinjak metara od nas, doletjelo golemo jato od 436 ptica. Po travi i kamenju, bilo ih je nemoguće izbrojati. Tek kad su se ponovo digle u nebo, zahvaljujući fotografiji došli smo do egzaktno cifre.

Jasminko Mulaomerović,  
B.Zenunija 6, 71000 Sarajevo, jasminko.mulaomerovic@bhtelecom.ba